

IZVOZ KULTURNIH DOBARA IZ BIH

Izvoz kulturnih dobara u BiH dozvoljen je uz podnošenje dozvole za izvoz carinskom organu, izdate na osnovu saglasnosti nadležnih organa u entitetima i Brčko Distriktu BiH.

1. KONVENCIJE I PROPISI

Bosna i Hercegovina je 12.7.1993. godine pristupila sljedećim Konvencijama i Protokolima koji se odnose na zaštitu kulturne i prirodne baštine:

- Konvencija o zaštiti kulturnih dobara u slučaju oružanog sukoba
- Konvencija o mjerama za zabranu i sprečavanje nedopuštenog uvoza, izvoza i prenosa vlasništva kulturnih dobara
- Konvencija o zaštiti svjetske kulturne i prirodne baštine
- Konvencija o zaštiti podvodne kulturne baštine
- UNIDROIT – Konvencija o ukradenim ili nezakonito izvezenim kulturnim dobrima

Propisi u Federaciji BiH

- Zakon o zaštiti i korištenju kulturno-istorijskog i prirodnog naslijeđa („Službeni list SRBiH“, br. 20/85 i 12/87 i „Službeni list SRBiH“, br. 3/93 i 13/94)

Propisi u Republici Srpskoj

- Zakon o kulturnim dobrima („Službeni glasnik Republike Srpske“, broj: 38/22)

2. POSTUPAK IZDAVANJA DOZVOLE

Klasifikacija i zaštita kulturnih dobara u Bosni i Hercegovini je definisana propisima entiteta i Brčko Distrikta BiH.

Izvoz kulturnih dobara iz BiH je moguć samo uz saglasnost nadležnih organa u entitetima i Brčko Distriktu BiH. Nadležna entitetska tijela su, u Republici Srpskoj Ministarstvo prosvjete i kulture, u Federaciji BiH Federalno ministarstvo kulture i sporta, a u Brčko Distriktu BiH je Odjel za ekonomski razvoj, sport i kulturu.

Ministarstvo vanjske trgovine i ekonomskih odnosa BiH na osnovu saglasnosti nadležnih organa entiteta i Brčko Distrikta BiH izdaje dozvolu za izvoz u skladu s Odlukom o klasifikaciji roba na režime izvoza i uvoza ("Službeni glasnik BiH", br. 22/98, 30/02 i 40/02, 4/13) i Uputstvom o izdavanju dozvole za izvoz i uvoz umjetnina i antikviteta („Službeni glasnik BiH“, broj 41/02). Odlukom su definisane robe za koje je potrebna dozvola za izvoz, ukoliko se radi o kolekcijama i primjercima od istorijskog, arheološkog, palentološkog, etnografskog ili numizmatičkog značaja.

Pokretna dobra kulturno-istorijskog i prirodnog naslijeđa koja uživaju prethodnu zaštitu i pokretna zaštićena dobra ne mogu se trajno iznositi u inostranstvo, shodno odredbama Zakona o zaštiti i korištenju kulturno-istorijskog i prirodnog naslijeđa i Uputstva o izdavanju dozvole za izvoz i uvoz umjetnina i antikviteta. Pokretni nacionalni spomenici kao i svi pod preventivnom zaštitom su djela od značaja za kulturnu baštinu Bosne i Hercegovine, te je prema domaćim i međunarodnim propisima trajni izvoz zabranjen.

Privremeno se može izvesti pokretno kulturno dobro proglašeno nacionalnim spomenikom samo u dva slučaja i to radi:

- restauracije i konzervacije samo ako za to ne postoje uslovi u BiH i
- prezentacije u inostranstvu, kako je definisano Zakonom o zaštiti i korištenju kulturno-istorijskog i prirodnog naslijeđa i Uputstvom o izdavanju dozvole za izvoz i uvoz umjetnina i antikviteta.

Ministarstvo vanjske trgovine i ekonomskih odnosa Bosne i Hercegovine izdaje privremenu ili trajnu dozvolu za izvoz (režim D) na osnovu saglasnosti entitetskih ministarstva kulture.

U slučaju privremenog izvoza umjetnina i kulturnih dobara iz BiH pošiljku može pratiti ATA karnet. U BiH ATA karnet izdaje i ovjerava Vanjskotrgovinska komora BiH i druge privredne komore u BiH koje je Vanjskotrgovinska komora BiH ovlastila za izdavanje ATA karneta u njezino ime. ATA KARNET se izdaje na osnovu Konvencije o privremenom uvozu - Istanbul, 26. juni 1990. godine ("Službeni glasnik BiH - Međunarodni ugovori", broj 1/10).

3. NADLEŽNOST CARINE

Uprava za indirektno oporezivanje, Sektor za carine vrši kontrolu izvoza/uvoza roba obuhvaćenih režimom dozvola, upoređujući dozvolu za izvoz sa robom koja je predmet izvoza. Carinski organ provjerava da li kulturno dobro koje je prijavljeno za izvozni carinski postupak prati dozvola Ministarstva vanjske trgovine i ekonomskih odnosa BiH.

4. KONTAKT

Za detaljnije informacije u vezi izvoza kulturnih dobara možete kontaktirati Glavnu kancelariju Uprave za indirektno oporezivanje, Sektor za carine, Odsjek za zaštitu intelektualne svojine, zabrana i ograničenja.